



Kolókiu” Rejionál TIDM nian, iha Bali, iha loron 27 no 28 fulan-agostu tinan 2015

DEKLARASAUN JOAQUIM DA FONSECA, EMBAIXADÓR TIMOR-LESTE NIAN IHA REINU UNIDU NO NEGOSIADÓR-XEFE HO AUSTRÁLIA

Uluk nana'in, ha'u hakarak agradese organizadór sira ba loron tolu eventu ne'e nian, ba Ministériu Negósiu Estranjeiru Indonézia, ba Tribunál Internasionál Direitu Tasi nian (TIDM-sigla iha lian portugés), no ba Institutu Marítimu Koreanu, no hahí ba organizasaun no apoiu ne'ebé maka dí'ak tebes.

Ami agradese wa'in tebes tanba hetan konvite ba Semináriu no ba “Kolókiu” ne'e. Apresentasaun no debate sira ne'ebé hala'o ona durante loron tolu ikus ne'e, fó benefísiu boot ba partisipante sira husi Timor-Leste nian.

Hanesan ema hotu hatene, Timor-Leste hanesan Estadu ida ho tasi-ninin ida ne'ebé luan. Zona marítima sira ne'ebé hale'u ita-nia país no ninia rekursu sira ne'ebé mak importante atu povu timoroan bele hala'o ninia moris no ba dezvoltamentu ekonómiku país nian.

Aleinde nia-importánsia ekonómika, zona marítima sira hadulas Timor-Leste mós iha ninia signifikadu simbóliku no polítiku ida ne'ebé importante. Povu Timor-Leste fó importánsia boot ida ba delimitasaun fronteira marítima permanente sira, atu bele garante ita-nia soberania nu'udar Estadu independente ida.

Horseik imi hetan mós biban hodi rona Ministru Negósiu Estranjeiru Indonézia nian, Retno Marsudi, Prezidente Repúblika Indonézia no Primeiru-Ministru Timor-Leste halo tiha ona akordu hodi hahú negosiasaun sira ba markasaun fronteira marítima nian sira entre nasaun rua ne'e. Ami hakarak tebes atu serbisu hamutuk ho kolega no belun indonézia sira iha espíritu kooperasaun no fiar ba malu, hodi alkansa objetivu ida ne'ebé pozitivu ba ita-nia nasaun.

Liafuan hirak eis Ministru Negósiu Estranjeiru Indonézia, Hasan Wirayuda, iha abertura semináriu nian, fó aten-barani mai ita, bainhira nia hateten katak indonézia tenke hahú halo negosiasaun agora hodi marka fronteira sira iha momentu ita hetan relasaun ida ne'ebé dí'ak liu.

Daudaun ne'e, fronteira marítima sira Timor-Leste ho Austrália, iha tasi Timor, seidak define ida. Rekursu hidrokarbonetu sira iha tasi Timor nian daudaun ne'e esplora hela tuir rejime temporáriu ida, liuhusi tratadu oinoin.

Timor-Leste kontinua hala'ó ho onra ba ninia obrigasaun internasionál nian sira iha delimitasaun fronteira marítima sira iha Tasi Timor nian, inklui ho Austrália. Ita iha esperansa atu simu husi Austrália kumprimisu ne'ebé hanesan. Bainhira Austrália hasees an husi juridisaun TDIM no Tribunál Internasionál Justisa nian kona-ba disputa sira ne'ebé iha relasaun ho fronteira marítima sira, opsaun ida de'it ba Timor-Leste atu marka fronteira marítima sira ho ninia viziñu australianu maka liuhosi negosiasaun sira.

Timor-Leste fiar metin katak direitu internasionál no mekanizmu sira ba nia aplikasaun bele fornese meiu ida ne'ebé efikáz hodi rezolve disputa sira, liu-liu bainhira parte sira iha relasaun ida ne'ebé la hanesan. Ita kompromete atu uza mekanizmu hirak ne'e di'ak liu hodi konsege hetan delimitasaun finál ba fronteira marítima sira ho Austrália.

Ba "kolókiu" sira oin mai, ita konsidera katak sei bele fó benefísiu ba TIDM bainhira halo simulasaun ba servisu no prosedimentu nian sira ne'ebé baibain uza iha audiénsia ba konflitu internasionál sira.

Dala ida tan, parabéns ba eventú ida ne'ebé di'ak tebes ho servisu di'ak husi organizasaun.

Obrigadu.